

○又諭據吳其濬奏。現獲甘三黎形。二犯形狀兇狡。本係痞棍。並不剃頭。供稱甘心從逆者。俱不剃頭等語。此等痞棍。甘心從逆。其黨羽自必眾多。若不趁此時。拏捕淨盡。必致貽患將來。著裕泰密行查訪。該匪等是否於從逆之後。始不剃頭。抑係痞棍惡習。平日即不剃頭。著查明據實覆奏。如有不法情事。務當隨時緝拏。嚴行懲辦。以淨根株。將此諭令知之。尋奏。湖北首逆鍾人杰等數名。並其頭目於滋事後。即不剃頭。此外附從各犯。仍照常剃頭。實無痞棍平日蓄髮情事。惟從逆餘匪。恐有竄匿。現已委員分赴各處。搜查以期淨絕根株。不留餘孽。報聞。